



---

Број/Број: **02/2-50-1-23-33/09**  
Сарајево/Sarajevo, 13.10.2009.

## ZAPISNIK

### **33. sjednice Komisije za vanjsku i trgovinsku politiku, carine, saobraćaj i komunikacije Doma naroda Parlamentarne skupštine Bosne i Hercegovine, održane 13.10.2009. godine**

Sjednicu Komisije za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH (u daljnjem tekstu: Komisija) sazvala je predsjedavajuća Komisije Alma Čolo.

Sjednici Komisije su, u svojstvu članova, prisustvovali: Alma Čolo, Adem Ibrahimpašić, Božo Ljubić i Slobodan Šaraba, te Nenad Pandurević, sekretar, i Dobrinka Savić, stručni saradnik u Komisiji. Odsustvo su opravdali Dušanka Majkić i Branko Zrno.

Sjednici su, u svojstvu predlagača i izvjestilaca, prisustvovali: Dušan Nešković, pomoćnik ministra za poljoprivredu, ishranu, šumarstvo i ruralni razvoj, Milenko Pandurević, šef Odsjeka za carinsku politiku, i Mia Salihagić, stručni saradnik u Ministarstvu vanjske trgovine i ekonomskih odnosa BiH, Vera Letica, pomoćnik ministra, i Lemana Vranić, viši stručni saradnik u Ministarstvu finansija i trezora BiH, Sead Avdić, savjetnik u Ministarstvu vanjskih poslova BiH, Savo Marjanac, direktor Sektora privrede u Vanjskotrговинској komori BiH, Aida Kreho, viši stručni saradnik u Zakonodavno-pravnom sektoru PSBiH, Igor Petković, savjetnik zamjenika predsjedavajućeg Doma naroda Dušanke Majkić, i Medina Delalić, viši stručni saradnik u Sektoru za odnose s javnošću u PSBiH.

Sjednica Komisije počela je u 13 sati.

Nakon što je konstatirala da postoji kvorum, predsjedavajuća Komisije Alma Čolo predložila je sljedeći

## DNEVNI RED

1. Usvajanje Zapisnika 32. sjednice Komisije;
2. Razmatranje Prijedloga zakona o slobodnim zonama u BiH (druga komisijska faza), predlagač: Vijeće ministara BiH;
3. Davanje saglasnosti za ratificiranje Deklaracije o jačanju nacionalnih i regionalnih kapaciteta za pripravnost i reakciju na epidemiju i za provođenje Međunarodnih zdravstvenih propisa (2005.);
4. Davanje saglasnosti za ratificiranje Konvencije Međunarodne organizacije rada o promotivnom okviru sigurnosti i zdravlja na radu br.187 iz 2006.godine i Preporuke vezane za promotivni okvir profesionalne sigurnosti i zdravlja na radu br.197 iz 2006.godine;
5. Davanje saglasnosti za ratificiranje Amandmana Međunarodne agencije za atomsku energiju na Konvenciju o fizičkoj zaštiti nuklearnog materijala;
6. Davanje saglasnosti za ratificiranje Kodeksa o postupanju Međunarodne agencije za atomsku energiju po pitanju sigurnosti i zaštite radioaktivnih izvora;
7. Davanje saglasnosti za ratificiranje Konvencije Međunarodne agencije za atomsku energiju o nuklearnoj sigurnosti, Beč, 17. juna 1994. godine;
8. Davanje saglasnosti za ratificiranje Sporazuma o finansiranju između Bosne i Hercegovine i Komisije Evropskih zajednica u pogledu prekograničnog programa između Bosne i Hercegovine i Republike Srbije na osnovu komponente prekogranične saradnje u okviru Instrumenta pretprijetne pomoći (IPA) za 2008. godinu;
9. Davanje saglasnosti za ratificiranje Sporazuma o finansiranju između Bosne i Hercegovine i Komisije Evropskih zajednica u pogledu prekograničnog programa između Bosne i Hercegovine i Republike Hrvatske na osnovu komponente prekogranične saradnje u okviru Instrumenta pretprijetne pomoći (IPA) za 2008. godinu;
10. Davanje saglasnosti za ratificiranje Sporazuma o finansiranju između Bosne i Hercegovine i Komisije Evropskih zajednica u pogledu prekograničnog programa između Bosne i Hercegovine i Crne Gore na osnovu komponente prekogranične saradnje u okviru Instrumenta pretprijetne pomoći (IPA) za 2008. godinu;
11. Davanje saglasnosti za ratificiranje Kreditnog sporazuma Projekat završetka i opremanja četiri bolnice između Saudijskog fonda za razvoj i Bosne i Hercegovine;
12. Razmatranje Izvještaja iz oblasti poljoprivrede za Bosnu i Hercegovinu za 2008. godinu;

13. Razmatranje informacija Ministarstva vanjskih poslova BiH:
  - Informacije o konstituiranju delegacije Evropskog parlamenta za odnose s Albanijom, Bosnom i Hercegovinom, Srbijom, Crnom Gorom i Kosovom;
  - Liberalizacija viznog režima – aktivnosti u Evropskom parlamentu;
  - Liberalizacija viznog režima – sjednice Komiteta za vanjske poslove (AFET) i Komiteta za građanske slobode, pravdu i unutrašnje poslove Evropskog parlamenta (LIBE), Brisel, 29. i 30. septembar 2009.;
14. Razmatranje izvještaja o međunarodnim aktivnostima komisija i parlamentarnih delegacija PSBiH:
  - Izvještaj sa 18. godišnjeg zasjedanja Parlamentarne skupštine OSCE-a, Vilnius, od 29. 6. do 3. 7. 2009.;
15. Tekuća pitanja.

*Predloženi dnevni red usvojen je jednoglasno.*

#### **Ad. 1. Usvajanje Zapisnika 32. sjednice Komisije**

*Zapisnik 32. sjednice Komisije usvojen je jednoglasno.*

#### **Ad. 2. Razmatranje Prijedloga zakona o slobodnim zonama u BiH (druga komisijska faza), predlagač: Vijeće ministara BiH**

Na početku je predsjedavajuća Komisije Alma Čolo podsjetila prisutne na dosadašnju proceduru ovog zakona u Parlamentarnoj skupštini BiH. Istakla je da je Vijeće ministara BiH, kao ovlašteni predlagač, dostavilo 23.7.2009., Parlamentarnoj skupštini BiH Prijedlog zakona o slobodnim zonama u BiH radi razmatranja po osnovnom zakonodavnom postupku. Komisija je Prijedlog zakona razmatrala u prvoj komisijskoj fazi na 31. sjednici, održanoj 9.9.2009., i jednoglasno podržala principe. Dom naroda je na 35. sjednici, 15.9.2009., usvojio Prijedlog zakona u prvom čitanju i tom prilikom usvojio dva zaključka. Prvi, da se produži amandmanska faza do 48 sati prije održavanja sjednice Komisije na kojoj će biti razmatran, s obzirom da Predstavnički dom Parlamentarne skupštine BiH još nije bio završio proceduru usvajanja ovog prijedloga zakona. I drugi zaključak, da se u daljnjoj proceduri Prijedloga zakona o slobodnim zonama u BiH osigura mišljenje Upravnog odbora Uprave za indirektno oporezivanje. Identičan zaključak usvojio je prethodno i Predstavnički dom. Predstavnički dom je, u međuvremenu, na 61. sjednici, održanoj 30.9.2009., razmatrao Prijedlog zakona u drugom čitanju iako mišljenje Upravnog odbora Uprave za indirektno oporezivanje nije dostavljeno. Na istoj sjednici Predstavnički dom usvojio je Prijedlog zakona u drugom čitanju s četiri amandmana.

Predsjedavajuća je dalje podsjetila da se Prijedlog zakona razmatra u drugoj komisijskoj fazi, tj. radi dostavljanja izvještaja Domu naroda. Komisija se prvo izjašnjava o predloženim amandmanima, a potom se glasa o Prijedlogu zakona u cjelini. Informirala je prisutne da su u toku amandmanske faze amandmane na Prijedlog zakona blagovremeno uložili Alma Čolo (četiri amandmana) i Božo Ljubić (pet amandmana). Za amandmane koje je ona uložila istakla je da se radi o identičnim amandmanima koji su već prethodno usvojeni u Predstavničkom domu, dok je Božo Ljubić uložio potpuno nove amandmane.

Nakon uvodnog obrazloženja, predsjedavajuća je otvorila raspravu o uloženim amandmanima i predložila da se prvo razmatraju njeni amandmani jer su uloženi prije amandmana Bože Ljubića. Članovi Komisije jednoglasno su podržali prijedlog. Predsjedavajuća je zamolila predstavnika nadležnog ministarstva da iznese stav Ministarstva u vezi sa svim njenim amandmanima.

Milenko Pandurević, šef Odsjeka za carinsku politiku Ministarstva vanjske trgovine i ekonomskih odnosa BiH, istakao je da se radi o amandmanima koji su prihvaćeni u Predstavničkom domu i da se Ministarstvo već ranije izjasnilo o njima. Ponovio je da su sva četiri amandmana Alme Čolo prihvatljiva za Ministarstvo.

Nakon izlaganja predstavnika Ministarstva vanjske trgovine i ekonomskih odnosa BiH, pristupilo se glasanju o uloženim amandmanima. *Komisija je jednoglasno prihvatila sljedeće amandmane Alme Čolo:*

#### **Amandman I.**

U članu 12. riječi: „u roku od 12 mjeseci“ zamjenjuju se riječima: „u roku od 24 mjeseca“.

#### **Amandman II.**

U članu 15. u stavu (1) u tački a) riječi: „u roku od 12 mjeseci“ zamjenjuju se riječima: „u roku od 24 mjeseca“.

#### **Amandman III.**

U članu 19. dodaje se novi stav (2) koji glasi:

„(2) Entiteti i Brčko Distrikt BiH usaglasit će svoje propise u roku od tri mjeseca od dana stupanja na snagu ovog zakona.“

#### **Amandman IV.**

U članu 20. riječi: „šest mjeseci“ zamjenjuju se riječima: „tri mjeseca“.

U nastavku je otvorena rasprava o amandmanima Bože Ljubića.

Božo Ljubić pročitao je svoj prvi amandman koji glasi:

### **Amandman I.**

U Prijedlogu zakona o slobodnim zonama u BiH član 3. (Područja) mijenja se i glasi:

#### **„Član 3. (Područja)**

Slobodna zona osniva se na području mjesta koja su otvorena za međunarodni javni saobraćaj i na drugim mjestima gdje postoje uslovi za rad slobodne zone.

U obrazloženju amandmana istakao je da ne vidi razloga za vezivanje lokacije zone uz pomorsku, riječnu ili zračnu luku. Naveo je da smatra da je cijela BiH jedno carinsko područje te da nema razloga ograničavati lociranje slobodnih zona gdje god za to postoje uslovi.

Milenko Pandurević se u svom obrazloženju stava Ministarstva o ovom amandmanu prvo zahvalio gosp. Ljubiću na namjeri da poboljša ovaj zakon. Međutim, naglasio je da predloženi amandman nije prihvatljiv za nadležno ministarstvo. Dodao je da se u članu 3. Prijedloga zakona radi o terminologiji koja se inače koristi u ovoj oblasti, te da ne vidi da bi se išta poboljšalo ovim amandmanom.

Stav Ministarstva vanjske trgovine i ekonomskih odnosa BiH dodatno je obrazložila i Mia Salihagić, stručni saradnik u Ministarstvu. U tom smislu naglasila je da, ako bi bilo prihvaćeno ono što se predlaže ovim amandmanom, onda bi se osnivanje slobodne zone vezivalo samo za mjesta koja su otvorena za međunarodni javni saobraćaj, dok se, prema formulaciji Ministarstva, u Prijedlogu zakona kaže da se slobodna zona može osnivati i na drugim mjestima, dakle na mjestima koja nisu otvorena za međunarodni javni saobraćaj, ako ispunjavaju uslove za osnivanje slobodne zone. Dodala je da smatra da je formulacija člana 3. Prijedloga zakona šira od prijedloga u Amandmanu I. Bože Ljubića.

Nakon rasprave u kojoj su učestvovali: Božo Ljubić, Alma Čolo, Adem Ibrahimpašić, te Milenko Pandurević i Mia Salihagić, pristupilo se glasanju. *Komisija, s jednim glasom „za“, jednim glasom „protiv“ i dva „suzdržana“ glasa, nije prihvatila Amandman I. Bože Ljubića.*

Božo Ljubić obrazložio je svoj sljedeći amandman:

## **Amandman II.**

U članu 8. (Pokretanje postupka) u stavu (1) riječi: „ako je to ekonomski opravdano i“, brišu se.

U stavu (2) iza riječi: „Upravnog odbora“ briše se zarez i dodaju riječi: „Uprave za indirektno oporezivanje“, dok se riječi: „formiranog po Zakonu o sistemu indirektnog oporezivanja u Bosni i Hercegovini („Službeni glasnik BiH“, br. 44/03 i 52/04)“ brišu.

Stav (3) briše se, a dosadašnji stav (4) postaje stav (3).

U obrazloženju amandmana istakao je da se u stavu (1) predlaže brisanje riječi: „ako je to ekonomski opravdano i“, s obzirom, kako je naglasio, da opravdanost mora biti i ekonomska i ekološka itd. Predložio je u stavu (2) dodavanje riječi: „Uprave za indirektno oporezivanje“, s obzirom da je Zakonom o indirektnom oporezivanju obrađeno i regulirano formiranje Upravnog odbora Uprave za indirektno oporezivanje.

U vezi s prijedlogom da se briše stav (3), istakao je da je ekonomski ista opravdanost ako se roba izvozi iz slobodne zone ili se robom proizvedenom u slobodnoj zoni supstituira uvoz. Dodao je da se, ako bi ostao stav (3), sužava broj potencijalnih korisnika zona, a svako, i najmanje fiskalno pomjerenje dovodi do mijenjanja izvoznih uslova što otvara dugotrajne sudske procese po pitanju štete radi promjene izvoznih uslova.

Mia Salihagić istakla je da je Ministarstvo vanjske trgovine i ekonomskih odnosa BiH protiv ovog amandmana. Iznijela je obrazloženje u kojem je naglasila da je ekonomska opravdanost osnovni razlog zbog kojeg se osniva slobodna zona. Definicija ekonomske opravdanosti data je u članu 8. stav 3. navedenog zakona i istakla da je to osnovni uslov koji korisnici moraju ispunjavati. Ponovila je da se ekonomska opravdanost zasniva na priloženom elaboratu, na osnovu kojeg se može cijeliti da li ona postoji ili ne. Pojasnila je da je ekonomska opravdanost kao institut na isti način definirana i Zakonom o carinskoj politici i dodala da se Ministarstvo mora voditi Zakonom o carinskoj politici te da je i Prijedlog zakona o slobodnim zonama u potpunosti baziran na Zakonu o carinskoj politici. U prijelaznim i završnim odredbama samog Zakona o carinskoj politici navedeno je da taj zakon ima veću pravnu snagu u odnosu na ostale zakone koji se tiču carinske politike. Dakle, s obzirom da se Zakonom o slobodnim zonama usklađuje ono što je navedeno u Zakonu o carinskoj politici, navedeni amandman doista je neprihvatljiv.

Nakon rasprave u kojoj su učestvovali: Božo Ljubić, Alma Čolo, Adem Ibrahimpašić, te Milenko Pandurević i Mia Salihagić, pristupilo se glasanju. *Komisija, s jednim glasom „za“, dva glasa „protiv“ i jednim „suzdržanim“, nije prihvatila Amandman II. Bože Ljubića.*

U nastavku je Božo Ljubić obrazložio amandman III. koji glasi:

### **Amandman III.**

U članu 10. (Ograđivanje zone) u stavu (3) riječi: „i s morske, odnosno riječne strane“ brišu se.

U obrazloženju je istakao da kao i kod Amandmana I. ne vidi razloge za vezivanje lokacije zone uz pomorsku, riječnu ili zračnu luku. Cijela BiH je jedno carinsko područje i gdje god postoje uslovi ne vidi zašto bi bilo neophodno ograničavati lociranje slobodnih zona.

Mia Salihagić kazala je da se Ministarstvo vanjske trgovine i ekonomskih odnosa BiH protivi ovom amandmanu. U obrazloženju je istakla da treba imati u vidu član 10. gdje je od stava 1. do 6. nabrojano kako se slobodna zona ograđuje i označava. Tu je navedeno da slobodna zona mora biti ograđena i označena, da ona mora biti ograđena i označena i uređena tako da se promet robe vozila i lica u zoni može odvijati samo kroz određene ulaze i izlaze. Dalje se osvrnula na stav (3) i izmjenu koja se predlaže amandmanom i istakla da za to nema potrebe jer je već u Prijedlogu zakona definirano da se ograđivanje i označavanje odnosi i na slobodne zone osnovane u morskim i riječnim lukama.

Nakon rasprave u kojoj su učestvovali svi članovi Komisije i predstavnici Ministarstva, predsjedavajuća Alma Čolo predložila je da se Amandman III. Bože Ljubića modificira u skladu s prijedlozima iznesenim u raspravi. Predložila je da se amandman modificira i da glasi:

### **Amandman III.**

U članu 10. u stavu (3) nakon riječi: „Slobodna zona“ dodaju se: riječi „locirana u pomorskoj ili riječnoj luci“, a ostatak rečenice ostaje nepromijenjen.

Božo Ljubić saglasio se s prijedlogom, nakon čega se pristupilo glasanju. *Komisija je jednoglasno prihvatila modificirani amandman III. Bože Ljubića.*

Božo Ljubić obrazložio je svoj sljedeći amandman.

#### **Amandman IV.**

U članu 11. (Promjena granica) riječi: „odgovarajuće se primjenjuje“ mijenjaju se i glase: „primjenjuju se odgovarajuće“, dok se riječi: „o osnivanju slobodne zone“ brišu.

U obrazloženju je istakao da u Prijedlogu zakona o slobodnim zonama u BiH red riječi u članu 11. ne odgovara duhu jezika. S tim u vezi predložio je brisanje riječi: „o osnivanju slobodne zone“, s obzirom da je jasno o kojem zakonu se radi, čim je naveden velikim početnim slovom.

Mia Salihagić kazala je da je i u slučaju ovog amandmana Ministarstvo vanjske trgovine i ekonomskih odnosa BiH protiv. U obrazloženju je istakla da su prilikom izrade Prijedloga zakona pribavljena sva relevantna mišljenja u skladu s članom 31. Poslovnika o radu Vijeća ministara BiH, a jedno od njih bilo je Mišljenje Ureda za zakonodavstvo koji je nadležan za davanje pravnog mišljenja o materijalima koji se upućuju Vijeću ministara BiH u pogledu njegovog metodološkog jedinstva u pripremi i u pogledu usaglašenosti sa Ustavom i zakonima BiH.

Nakon rasprave u kojoj su učestvovali svi članovi Komisije i predstavnici Ministarstva, predsjedavajuća Alma Čolo predložila je da se Amandman IV. Bože Ljubića modificira u skladu s prijedlozima iznesenim u raspravi. Predložila je da se amandman modificira i da glasi:

#### **Amandman IV.**

U članu 11. riječi: “odgovarajuće se primjenjuju” zamjenjuju se riječima: “primjenjuju se odgovarajuće”.

Božo Ljubić saglasio se s prijedlogom, nakon čega se pristupilo glasanju. *Komisija je jednoglasno prihvatila modificirani Amandman IV. Bože Ljubića.*

U nastavku je Božo Ljubić dao obrazloženje amandmana V., koji glasi:

#### **Amandman V.**

U članu 15. (Prestanak rada) u stavu (1) tačka b) briše se.

Stav (4) briše se.

U obrazloženju je istakao da se brisanje tačke b) predlaže iz istih razloga koji su navedeni kod Amandmana II. Ekonomski je ista opravdanost ako se roba izvozi iz slobodne



zone ili roba proizvedena u slobodnoj zoni supstituira uvoz. Ako bi ostala tačka b), sužava se broj potencijalnih korisnika zona, a svako i najmanje fiskalno pomjeranje dovodi do mijenjanja izvoznih uslova što otvara dugotrajne sudske procese po pitanju štete radi promjene izvoznih uslova. U obrazloženju za brisanje stava (4) istakao je da stav 3. regulira donošenje rješenja u kojem je sastavni dio i datum prestanka poslovanja zone, te time nema razloga za tim stavom.

Predstavnici Ministarstva vanjske trgovine i ekonomskih odnosa BiH istakli su da se protive i ovom amandmanu i dodali da su argumentaciju za to izložili već prilikom rasprave o Amandmanu II. Bože Ljubića. *Nakon toga, pristupilo se glasanju i Komisija je, s jednim glasom „za“, dva glasa „protiv“ i jednim „suzdržanim“, odbila Amandman V. Bože Ljubića.*

Nakon provedene rasprave i izjašnjavanja o svima amandmanima, *Komisija je jednoglasno prihvatila Prijedlog zakona o slobodnim zonama u BiH sa usvojenim amandmanima, te predložila Domu naroda Parlamentarne skupštine BiH njegovo usvajanje.*

Za izvjestioca na sjednici Doma Komisija je odredila Almu Čolo, predsjedavajuću Komisije.

- Ad. 3. Davanje saglasnosti za ratificiranje Deklaracije o jačanju nacionalnih i regionalnih kapaciteta za pripravnost i reakciju na epidemiju i za provođenje Međunarodnih zdravstvenih propisa (2005.);**
- Ad. 4. Davanje saglasnosti za ratificiranje Međunarodne organizacije rada Konvencije o promotivnom okviru sigurnosti i zdravlja na radu br.187 iz 2006. godine i Preporuke vezane za promotivni okvir profesionalne sigurnosti i zdravlja na radu br.197 iz 2006.godine;**
- Ad. 5. Davanje saglasnosti za ratificiranje Amandmana Međunarodne agencije za atomsku energiju na Konvenciju o fizičkoj zaštiti nuklearnog materijala;**
- Ad. 6. Davanje saglasnosti za ratificiranje Kodeksa o postupanju Međunarodne agencije za atomsku energiju po pitanju sigurnosti i zaštite radioaktivnih izvora;**
- Ad. 7. Davanje saglasnosti za ratificiranje Konvencije Međunarodne agencije za atomsku energiju o nuklearnoj sigurnosti, Beč, 17. juna 1994. godine;**

Predsjedavajuća je predložila da se svih pet sporazuma razmatra zajedno s obzirom da su svi u nadležnosti Ministarstva civilnih poslova BiH. Konstatirala je da sjednici ne prisustvuje predstavnik nadležnog ministarstva. Međutim, informirala je članove Komisije da je nadležna komisija Predstavničkog doma već razmatrala sve ove sporazume i predložila

Predstavničkom domu davanje saglasnosti. Predložila je da se Komisija izjasni o sporazumima a da se, prilikom slanja poziva za narednu sjednicu kada budu razmatrani sporazumi, uputi i upozorenje predstavnicima ministarstava da sporazumi neće biti razmatrani ako nema predstavnika resornih ministarstava.

Slobodan Šaraba izrazio je negodovanje zbog neprisustva predstavnika nadležnog ministarstva i istakao da on neće podržati ove sporazume, odnosno da će prilikom glasanja biti suzdržan.

*Nakon toga članovi Komisije su većinom glasova odlučili da predlože Domu naroda Paramentarne skupštine BiH davanje saglasnosti za ratificiranje:*

- *Deklaracije o jačanju nacionalnih i regionalnih kapaciteta za pripravnost i reakciju na epidemiju i za provođenje Međunarodnih zdravstvenih propisa (2005.);*
- *Konvencije Međunarodne organizacije rada o promotivnom okviru sigurnosti i zdravlja na radu br.187 iz 2006.godine i Preporuke vezane za promotivni okvir profesionalne sigurnosti i zdravlja na radu br.197 iz 2006.godine;*
- *Amandmana Međunarodne agencije za atomsku energiju na Konvenciju o fizičkoj zaštiti nuklearnog materijala;*
- *Kodeksa o postupanju Međunarodne agencije za atomsku energiju po pitanju sigurnosti i zaštite radioaktivnih izvora;*
- *Konvencije Međunarodne agencije za atomsku energiju o nuklearnoj sigurnosti, Beč, 17. juna 1994. godine;*

**Ad. 8. Davanje saglasnosti za ratificiranje Sporazuma o finansiranju između Bosne i Hercegovine i Komisije Evropskih zajednica u pogledu prekograničnog programa između Bosne i Hercegovine i Republike Srbije na osnovu komponente prekogranične saradnje u okviru Instrumenta pretpristupne pomoći (IPA) za 2008. godinu;**

**Ad. 9. Davanje saglasnosti za ratificiranje Sporazuma o finansiranju između Bosne i Hercegovine i Komisije Evropskih zajednica u pogledu prekograničnog programa između Bosne i Hercegovine i Republike Hrvatske na osnovu komponente prekogranične saradnje u okviru Instrumenta pretpristupne pomoći (IPA) za 2008. godinu;**

**Ad. 10. Davanje saglasnosti za ratificiranje Sporazuma o finansiranju između Bosne i Hercegovine i Komisije Evropskih zajednica u pogledu prekograničnog programa između Bosne i Hercegovine i Crne Gore na osnovu komponente prekogranične saradnje u okviru Instrumenta pretpristupne pomoći (IPA) za 2008. godinu;**

Predsjedavajuća je predložila da se sva tri sporazuma razmatraju zajedno s obzirom da su svi u nadležnosti Ministarstva finansija i trezora BiH i da se odnose na finansiranje u okviru IPA sredstava. Prijedlog je jednoglasno prihvaćen.

Uvodno obrazloženje dala je Vera Letica, pomoćnik ministra finansija i trezora BiH. Istakla je da se sva tri sporazuma tiču bilateralne prekogranične saradnje u okviru IPA-e komponente dva. Finansijski sporazumi već su potpisani te su samim tim stupili na snagu a i javni pozivi su objavljeni. Dva javna poziva su već zatvorena: sa Crnom Gorom i sa Srbijom, a 16.10.2009. bit će zatvoren i s Republikom Hrvatskom. To znači da su projektni prijedlozi uglavnom prikupljeni. I potom slijedi njihova evaluacija, odabir i dalje realizacija i finansiranje projekata. U svakom sporazumu nalazi se finansijska alokacija po zemljama partnerima i ukupnu vrijednost za 2008. godinu.

*Nakon toga članovi Komisije jednoglasno su odlučili da predlože Domu naroda Paramentarne skupštine BiH davanje saglasnosti za ratificiranje:*

- *Sporazuma o finansiranju između Bosne i Hercegovine i Komisije Evropskih zajednica u pogledu prekograničnog programa između Bosne i Hercegovine i Republike Srbije na osnovu komponente prekogranične saradnje u okviru Instrumenta pretpristupne pomoći (IPA) za 2008. godinu;*
- *Sporazuma o finansiranju između Bosne i Hercegovine i Komisije Evropskih zajednica u pogledu prekograničnog programa između Bosne i Hercegovine i Republike Hrvatske na osnovu komponente prekogranične saradnje u okviru Instrumenta pretpristupne pomoći (IPA) za 2008. godinu;*
- *Sporazuma o finansiranju između Bosne i Hercegovine i Komisije Evropskih zajednica u pogledu prekograničnog programa između Bosne i Hercegovine i Crne Gore na osnovu komponente prekogranične saradnje u okviru Instrumenta pretpristupne pomoći (IPA) za 2008. godinu;*

**Ad. 11. Davanje saglasnosti za ratificiranje Kreditnog sporazuma Projekat završetka i opremanja četiri bolnice između Saudijskog fonda za razvoj i Bosne i Hercegovine;**

Uvodno obrazloženje dala je Lemana Vranić, viši stručni saradnik u Ministarstvu finansija i trezora BiH. Istakla je da je ovo vrlo povoljan kredit u iznosu od 25 miliona dolara, uz 2% godišnje kamate, s grejs periodom od pet godina u okviru 25 godina otplate. Sporazum se odnosi na adaptaciju i dijelom na izgradnju i kupovinu opreme za četiri bolnice – Klinički centar Sarajevo, Safet Mujić Mostar, Klinička bolnica Mostar i Opća bolnica Konjic. Cilj svih ovih projekata je unapređenje pružanja medicinskih usluga velikom broju stanovnika putem završetka izgradnje i nabavke potrebne opreme. Zaključila je da se radi o vrlo povoljnom kreditu te dodala da je Saudijski fond spreman na finansiranje i budućih novih projekata.

Nakon uvodnog izlaganja predstavnice nadležnog ministarstva, *Komisija je jednoglasno odlučila da predloži Domu naroda Parlamentarne skupštine BiH davanje saglasnosti za ratificiranje:*

- *Kreditnog sporazuma Projekat završetka i opremanja četiri bolnice između Saudijskog fonda za razvoj i Bosne i Hercegovine.*

**Ad. 12. Razmatranje Izvještaja iz oblasti poljoprivrede za Bosnu i Hercegovinu za 2008. godinu**

Uvodno obrazloženje o Izvještaju podnio je Dušan Nešković, pomoćnik ministra vanjske trgovine i ekonomskih odnosa BiH. Na početku je istakao da se izvještaj priprema u skladu s odredbama Zakona o poljoprivredi, ishrani i ruralnom razvoju BiH gdje je u članu 23. tog zakona predviđeno da Ministarstvo vanjske trgovine i ekonomskih odnosa BiH svake godine redovno priprema i dostavlja izvještaj o stanju u sektoru poljoprivrede BiH. Izvještaj se radi u skladu s praksama u EU i namjena mu je prvenstveno da omogući da se u najvećem zakonodavnom organu, dakle u Parlamentarnoj skupštini BiH, razgovara o poljoprivredi, gdje se mogu dobiti određene smjernice i upute za poboljšanje stanja u sektoru poljoprivrede.

U nastavku je podsjetio da ovo nije prvi izvještaj koji je Ministarstvo pripremiло. Prvi izvještaj napravljen je 2006. godine i odnosi se na prikupljene podatke iz 2005. i prethodnih godina. Taj izvještaj pripremljen je u saradnji s Evropskom komisijom. Nakon toga je napravljen godišnji izvještaj 2007. godine, s vlastitim resursima. Ministarstvo je sada sposobno

da priprema godišnje izvještaje tačno po principima kako se to radi u EU, gdje svih 27 članica imaju obavezu redovnog godišnjeg sačinjavanja izvještaja o stanju u sektoru poljoprivrede. Prethodna dva izvještaja usvojilo je Vijeće ministara BiH, a Zakonom o poljoprivredi i ruralnom razvoju od prošle godine utvrđena je obaveza da se, na osnovu člana 23., godišnji izvještaj izrađuje na način da se pripremi, prikupi, uredi i dostavi Vijeću ministara BiH, koje ga prosljeđuje Parlamentarnoj skupštini BiH na razmatranje i usvajanje.

U daljnjem izlaganju naglasio je da izvještaj sadrži zvanične podatke koji oslikavaju pravo stanje u sektoru poljoprivrede u BiH. Podaci su preuzeti od zvaničnih institucija kao što su Agencija za statistiku BiH, entitetski zavodi za statistiku, a također su korišteni i zvanični podaci komora, a naročito Vanjskotrgovinske komore BiH.

Na kraju je istakao da ovaj izvještaj pokazuje polazno stanje i ni u kojem slučaju nije pravljen da pokaže lijepu stranu, nego stvarno stanje u kojem se nalazi poljoprivreda i prehrambena industrija u BiH.

Prije zaključenja rasprave o izvještaju, predsjedavajuća Komisije informirala je prisutne da je Predstavnički dom PSBiH prilikom usvajanja ovog izvještaja usvojio i jedan zaključak, te je s tim u vezi predložila da i Komisija usvoji isti zaključak i predloži da ga usvoji i Dom naroda.

*Nakon rasprave, Komisija je jednoglasno prihvatila Izvještaj iz oblasti poljoprivrede za Bosnu i Hercegovinu za 2008. godinu i predložila Domu naroda Parlamentarne skupštine BiH njegovo usvajanje, u skladu s članom 23. Zakona o poljoprivredi, ishrani i ruralnom razvoju BiH.*

Komisija je, također, jednoglasno usvojila i sljedeći zaključak i predaže Domu naroda Parlamentarne skupštine BiH njegovo donošenje:

*„Zadužuje se Vijeće ministara BiH da u roku od 60 dana uradi mjere za poboljšanje stanja u poljoprivredi, a posebno mjere koje će povećati pokrivenost uvoza – izvozom poljoprivrednih proizvoda“.*

Za izvjestioca na sjednici Doma naroda imenovana je Alma Čolo, predsjedavajuća Komisije.

**Ad. 13. Razmatranje informacija Ministarstva vanjskih poslova BiH:**

- **Informacije o konstituiranju delegacije Evropskog parlamenta za odnose s Albanijom, Bosnom i Hercegovinom, Srbijom, Crnom Gorom i Kosovom;**
- **Liberalizacija viznog režima – aktivnosti u Evropskom parlamentu;**
- **Liberalizacija viznog režima – sjednice Komiteta za vanjske poslove (AFET) i Komiteta za građanske slobode, pravdu i unutrašnje poslove Evropskog parlamenta (LIBE), Brisel, 29. i 30. septembar 2009.;**

Sead Avdić, savjetnik u Ministarstvu vanjskih poslova BiH, kratko se osvrnuo na informacije o liberalizaciji viznog režima. Istakao je da je ono što je suštinsko u ove dvije informacije je to da ima dosta optimizma da može doći do korekcije u dinamici stavljanja BiH na bijelu šengensku listu. Dodao je da je veoma važno da su dva komiteta Evropskog parlamenta, onaj o građanskim slobodama i drugi za vanjske poslove, dali pozitivno mišljenje na prijedlog rezolucije, koja će s mišljenjima i Evropske komisije, krajem novembra ili početkom decembra ove godine biti razmatrana na zasjedanju Evropskog parlamenta. Ovo nam daje mogućnost da možemo vjerovati da će doći do liberalizacije viznog režima i stavljanja na bijelu šengensku listu još od 1. januara 2010. Citirao je stav iz mišljenja parlamentarnih komiteta “da će se izuzimanje od viznog režima primjenjivati bez odgađanja odmah nakon što Evropska komisija procijeni da je svaka od ove dvije zemlje zadovoljila postavljene uslove iz Mape puta za liberalizaciju viznog režima, te obavještenje o toj procjeni bude objavljeno u “Službenom glasniku”. Komisija će evaluaciju obavljati na mjesečnoj osnovi i izvještavati Evropski parlament i Vijeće EU kao i zemlje na koje se odnosi”.

*Nakon izlaganja Seada Avdića, članovi Komisije primili su k znanju sve tri informacije Ministarstva vanjskih poslova BiH.*

**Ad. 14. Razmatranje izvještaja o međunarodnim aktivnostima komisija i parlamentarnih delegacija PSBiH:**

- **Izvještaj sa 18. godišnjeg zasjedanja Parlamentarne skupštine OSCE-a, Vilnius, od 29. 6. do 3. 7. 2009.;**

*Članovi Komisije jednoglasno su usvojili Izvještaj sa 18. godišnjeg zasjedanja Parlamentarne skupštine OSCE-a, Vilnius, od 29. 6. do 3. 7. 2009.*

## **Ad. 15. Tekuća pitanja**

U okviru ove tačke predsjedavajuća Čolo informirala je prisutne da se u organizaciji Evropskog parlamenta i Sabora Republike Hrvatske u Zagrebu, 26. i 27. oktobra 2009., održava parlamentarni seminar pod nazivom “Slobodna trgovina i regionalno unutrašnje tržište“. Kolegij Doma naroda Parlamentarne skupštine BiH je na sjednici, održanoj 1.10.2009., donio zaključak da Komisija za vanjsku i trgovinsku politiku, carine, saobraćaj i komunikacije DNPSBiH imenuje jednog svog člana da učestvuje na ovom seminaru. S obzirom da je rok za prijavu učešća bio 9.10.2009., predsjedavajuća je informirala članove Komisije da je predložila da se, u ime Komisije, na seminar uputi Adem Ibrahimpašić. Dodala je da je Kolegij Predstavničkog doma zadužio Zajedničku komisiju za ekonomske reforme i razvoj da imenuje dva člana, ali je Komisija imenovala samo Ivu Miru Jovića.

*Članovi Komisije primili su k znanju ovu informaciju.*

Sjednica Komisije završena je u 14,30 sati.

Sekretar Komisije  
za vanjsku i trgovinsku politiku,  
carine, saobraćaj i komunikacije  
Nenad Pandurević

Predsjedavajuća Komisije  
za vanjsku i trgovinsku politiku,  
carine, saobraćaj i komunikacije  
Alma Čolo